

Insentif cukai, geran sehingga RM40 juta kepada penaja Ekspo 2020 Dubai
Astro Awani
06 Julai 2019
Isabelle Leong,

PUTRAJAYA: Kementerian Tenaga, Sains, Teknologi, Alam Sekitar dan Perubahan Iklim (MESTECC) mengumumkan pemberian insentif dan geran sehingga RM40 juta bagi menggalakkan individu dan syarikat penaja untuk menyertai serta menyumbang dalam Ekspo 2020 Dubai.

Menterinya, Yeo Bee Yin mengumumkan Kementerian Kewangan telah meluluskan insentif cukai untuk sumbangan tunai atau penajaan penyertaan Malaysia di ekspo yang bakal berlangsung pada Oktober 2020 hingga April 2021 tersebut.

“Individu dan syarikat akan layak untuk potongan tujuh peratus dan 10 peratus daripada pendapatan agregat masing-masing di bawah Seksyen 44 (11C) (a) (b) Akta Cukai Pendapatan 1967, bermula 1 Julai 2019 hingga 10 April 2021,” kata Bee Yin pada majlis pelancaran Kempen My Butterfly Effect:Ekspo 2020 Dubai di Putrajaya pada Jumaat.

Tambahnya, bagi menggalakkan lebih banyak syarikat di Malaysia menyertai Pavilion Malaysia, Geran Pembangunan Pasaran yang bernilai RM200,000 diberikan oleh Perbadanan Pembangunan Perdagangan Luar Malaysia (MATRADE).

Ia akan diberikan kepada pemohon yang berjaya termasuk perusahaan kecil dan sederhana (PKS), kesatuan sekerja dan penyedia perkhidmatan professional yang terlibat dalam aktiviti mempromosi eksport antarabangsa.

“Dengan semua kelebihan yang ada pada perniagaan menyertai ekspo dan usaha kami untuk memudahkan penyertaan, saya pasti bilangan peserta akan terus meningkat.

“Pelancaran hari ini menandakan bahawa #MyButterflyEffect akan membantu kami menempa kejayaan besar di Dubai. Janganlah kita memandang rendah terhadap usaha secara konsisten melalui langkah-langkah kecil untuk menghasilkan impak besar,” tambahnya.

MESTECC menyasarkan seramai 1 juta pelawat ke Pavilion Malaysia dengan sekurang-kurangnya 20 delegasi daripada negara lain serta lebih 5,000 peserta menghadiri program-program tersebut.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/insentif-cukai-geran-sehingga-rm40-juta-kepada-penaja-ekspo-2020-dubai-211944>